

Hanuman Chalisa Lyrics

दोहा

श्रीगुरु चरन सरोज रज, निजमन मुकुरु सुधारि।
बरनउं रघुबर बिमल जसु, जो दायक फल चारि॥
बुद्धिहीन तनु जानिके, सुमिरौं पवन-कुमार।
बल बुधि बिद्या देहु मोहिं, हरहु कलेस बिकार॥

चौपाई

जय हनुमान ज्ञान गुन सागर॥
जय कपीस त्रिहुं लोक उजागर॥ 1 ॥

राम दूत अतुलित बल धामा॥
अंजनि-पुत्र पवनसुत नामा॥ 2 ॥

महाबीर बिक्रम बजरंगी॥
कुमति निवार सुमति के संगी॥ 3 ॥

कंचन बरन बिराज सुबेसा॥
कानन कुण्डल कुंचित केसा॥ 4 ॥

हाथ बज्र औ ध्वजा बिराजे॥
कांधे मूंज जनेउ साजे॥ 5 ॥

शंकर सुवन केसरी नंदन॥
तेज प्रताप महा जग वंदन॥ 6 ॥

बिद्यावान गुनी अति चातुर॥
राम काज करिबे को आतुर॥ 7 ॥

प्रभु चरित्र सुनिबे को रसिया॥
राम लखन सीता मन बसिया॥ 8 ॥

सूक्ष्म रूप धरि सियहिं दिखावा॥
बिकट रूप धरि लंक जरावा॥ 9 ॥

भीम रूप धरि असुर संहारे॥
रामचन्द्र के काज संवारे॥ 10 ॥

लाय सजीवन लखन जियाये॥
श्री रघुबीर हरषि उर लाये॥ 11 ॥

रघुपति कीन्ही बहुत बड़ाई॥
तुम मम प्रिय भरतहि सम भाई॥ 12 ॥

सहस बदन तुम्हरो जस गावैं॥
अस कहि श्रीपति कण्ठ लगावैं॥ 13 ॥

सनकादिक ब्रह्मादि मुनीसा॥
नारद सारद सहित अहीसा॥ 14 ॥

जम कुबेर दिगपाल जहां ते॥
कबि कोबिंद कहि सके कहां ते॥ 15 ॥

तुम उपकार सुग्रीवहिं कीन्हा॥
राम मिलाय राज पद दीन्हा॥ 16 ॥

तुम्हरो मंत्र बिभीषन माना॥
लंकेश्वर भए सब जग जाना॥ 17 ॥

जुग सहस्र जोजन पर भानु॥
लील्यो ताहि मधुर फल जानू॥ 18 ॥

प्रभु मुद्रिका मेलि मुख माहीं॥
जलधि लांघि गये अचरज नाहीं॥ 19 ॥

दुर्गम काज जगत के जेते॥
सुगम अनुग्रह तुम्हरे तेते॥ 20 ॥

राम दुआरे तुम रखवारे॥
होत न आज्ञा बिनु पैसारे॥ 21 ॥

सब सुख लहै तुम्हारी सरना॥
तुम रच्छक काहू को डर ना॥ 22 ॥

आपन तेज सम्हारो आपै॥
तीनों लोक हांक तैं कांपै॥ 23 ॥

भूत पिसाच निकट नहिं आवै॥
महाबीर जब नाम सुनावै॥ 24 ॥

नासै रोग हरे सब पीरा ॥
जपत निरन्तर हनुमत बीरा ॥ 25 ॥

संकट तें हनुमान छुड़ावै ॥
मन क्रम बचन ध्यान जो लावै ॥ 26 ॥

सब पर राम तपस्वी राजा ॥
तिन के काज सकल तुम साजा ॥ 27 ॥

और मनोरथ जो कोई लावै ॥
सोई अमित जीवन फल पावै ॥ 28 ॥

चारों जुग परताप तुम्हारा ॥
है परसिद्ध जगत उजियारा ॥ 29 ॥

साधु संत के तुम रखवारे ॥ ॥
असुर निकन्दन राम दुलारे ॥ 30 ॥

अष्टसिद्धि नौ निधि के दाता ॥
अस बर दीन जानकी माता ॥ 31 ॥

राम रसायन तुम्हरे पासा ॥
सदा रहो रघुपति के दासा ॥ 32 ॥

तुम्हारे भजन राम को पावै ॥
जनम जनम के दुख बिसरावै ॥ 33 ॥

अंत काल रघुबर पुर जाई ॥
जहां जन्म हरिभक्त कहाई ॥ 34 ॥

और देवता चित्त न धरई ॥
हनुमत सेइ सर्व सुख करई ॥ 35 ॥

सङ्कट कटै मिटै सब पीरा ॥
जो सुमिरै हनुमत बलबीरा ॥ 36 ॥

जय जय जय हनुमान गोसाई ॥
कृपा करहु गुरुदेव की नाई ॥ 37 ॥

जो सत बार पाठ कर कोई ॥
छूटहि बन्दि महा सुख होई ॥ 38 ॥

जो यह पढ़ै हनुमान चालीसा ॥
होय सिद्धि साखी गौरीसा ॥ 39 ॥

तुलसीदास सदा हरि चेरा ॥
कीजै नाथ हृदय महं डेरा ॥ 40 ॥

दोहा

पवनतनय संकट हरन, मंगल मूरति रूप।
राम लखन सीता सहित, हृदय बसहु सुर भूप ॥